

## KONTROL MOZIOA

### Gipuzkoako Foru Aldundiak hiriarteko garraio zerbitzu publiko erregularraren emakida aurreproiektua dela eta

Ayem Oskoz Urrutikoetxea EH BILDU udal taldeko zinegotziak, Udaltzatzen Organo Araudiko 98. artikulua oinarri, kontrol mozio hau aurkezten du, Udaltzatzen azter dadin. Mozioa 2018ko uztailearen 9an Gune Publikoen Batzordean aztertutako interpelazioaren ondorioa da.

### AZALPENA

Uztailearen 24an Gipuzkoako Aldizkari Ofizialean (GAO) argitaratu zen Gipuzkoako Foru Aldundiak Tolosa, N1 eta Buruntzaldeko autobus zerbitzu emakidaren aurreproiektuari eginiko zuzenketen erantzuna. Tartean Donostiako Udalak eginiko zuzenketei emandako erantzuna. Irakur dezakegunez, Donostiako Udalak aurkeztutako alegazioak ez dira aintzat hartu; horien artean, Aldundiak ukatu egiten du koordinazio planik egin behar duenik, momentuz behintzat. Bestalde, aurreproiektuko 1.3.3 puntuari eginiko alegazioari Aldundiak hau erantzun dio: *“Kontzesio esparrutik igarotzen diren zerbitzuek ez dute trafiko debekurik izango euren ibilbidean eta hirugarrenek, kontzesio honen bitartez, esleipendunari emandako kontzesio eskubideak errespetatuko dituzte”*. Eta jarraian hau dio Aldundiak: *“Donostiako aspaldiko aldarrikapen bati erantzunez hau gehitzen da: hala ere, Donostian trafiko debekuak izango ditu hiri barruan egiten diren ibilbideetarako”*.

Uste dugu puntu hau aurrera ateraz gero, Donostian autobusa erabiltzen duten pertsonen kaltetan izango dela, gaur egungo zerbitzu bat ukatuko zaielako, Eta bereziki larria iruditzen zaigu zerbitzuaren eguneko lehen eta azken orduetako zerbitzuak erabiltzea ukatzea; batzuetan Dbusek baino ordutegi zabalagoa baitute, Buruntzaldeko zerbitzua ematen duten autobusen kasuan adibidez.

Honi beste arazo bat gehitu behar zaio. Orain arte, behintzat, emakidan ematen ziren zerbitzuek Dbusi eragiten zioten, eta bidaiari kopuru “galera” orekatzeko, konpentsazio ekonomiko bat ematen zuen Foru Aldundiak. Hau ere desagertuko litzateke, Aldundiak emandako erantzunaren arabera.

**EH Bildu talde politikoa**  
**Grupo político EH Bildu**

Ijentea, 1 - Tel. 943481027 - [www.donostia.ehbildu.eus](http://www.donostia.ehbildu.eus) -  
20003 Donostia

Ondorioa garbia da, beraz: diru gutxiago eta zerbitzu okerragoa Donostiarentzat.

Honi buruz batzordean galdetuta, zinegotzi ordezkariak esan zigun bere kezka handiena, neurri hau aurrera ateraz gero, zerbitzua okertzea dela. Ez hainbeste Udalak konpentsazioaren diru hori ez jasotzea; bere hitzetan, Aldundiak emandako zerbitzuak DBusek bere gain har ditzakeelako. Edozein kasutan Aldundiaren emakida aurreproiektuarekin ez daudela ados eta Donostiako Udalaren interesen defentsan jardungo dutela adierazi zuen batzordean, nahiz eta ez zuen zehaztu zein modutan.

Udal gobernuak erabakiko du egoera honi aurre egiteko zein den biderik onena, nahiz eta harrigarria iruditzen zaigun bai Foru Aldundian bai Donostiako Udalean alderdi berberak osatutako gobernu akordio bat egonik, adostasunik lortu ez izana gai honen inguruan, herritarren mesedetan noski.

Edozein kasutan Aldundiak aurkeztutako aurreproiektua Donostian autobusa erabiltzen duten pertsonentzat guztiz kaltegarria dela uste dugu. Zerbitzu batzuk ukatu egiten dituelako eta Donostiako Udalari diru sarrera bat kentzen diolako.

Gainera, herritarrentzat ulergaitza da autobus zerbitzuetan, haiek kudeatzen dituzten administrazioaren arabera, toki batean jaitsi ahal izatea edo ez. Administrazioek herritarren alde egin behar dute lan eta zerbitzu publikoen erabilera erraztu eta ez eragotzi.

Honegatik guztiagatik ondorengo kontrol mozioa aurkezten du behean sinatzen duen zinegotziak:

## KONTROL MOZIOA

1.- Udalbatzak hertsatuki eskatzen dio Udal Gobernuari Donostiako autobus erabiltzaileak kaltetuak izango ez diren akordio bat lor dezan Gipuzkoako Foru Aldundiarekin, hiriarteko emakidaren inguruan.

2.- Udalbatzak hertsatuki eskatzen dio Udal Gobernuari emakidaren inguruan adostasunik lortu ezean, Donostia kaltetua atera ez dadin eman beharreko pausoak eman ditzala Gipuzkoako Foru Aldundiaren aurrean.

2.- Udalbatzak hertsatuki eskatzen dio Udal Gobernuari, emakidaren inguruan Gipuzkoako Foru Aldundiarekin akordiorik ez balego eta beste bide batzuek huts egingo balute (errekerimenduak eta abar), gaur egungo zerbitzuak (Dbus eta Gipuzkoako Foru Aldundiarenak) kontuan izanik, etorkizunean ere zerbitzu eta ordutegi horiek berma ditzala.

Donostian, 2018ko irailaren 21ean

Ayem Oskoz Urrutikoetxea  
EH Bildu udal taldeko zinegotzia